

БУТРУСНИНГ БИРИНЧИ МАКТУБИ

Кириш

Мазкур мактуб муаллифи Исо Масихнинг шогирди ҳаворий Бутрусдир. Бутрус ушбу мактубини Рим империясига қарашли тўртта вилоятда* яшаган, жамият томонидан аёвсиз таъқиб қилинган масиҳийларга ёзган. Биринчи асрда масиҳий бўлиш дегани, албатта, қувғинларга дучор бўлиб, ҳар хил азобларга бардош берib яшаш дегани эди.

Муаллиф ўз мактубида ўша имонлиларга далда ва тасалли беради. Қувғинларга қарамай, уларни имонда событ туришга ундейди. У Худонинг меҳрибонлиги ҳақида сўз юритади. Исо Масихнинг ўлими ва тирилиши туфайли масиҳийлар бебаҳо умидга сазовор бўлганлари ҳақида баён қиласиди. Сўнг улар жамиятда ўзларини қандай тутишлари кераклигини айтади, Раббимиз ҳақи давлат раҳбарига ва бошлиқларга бўйсуниш кераклигини уларга уқтиради. Муаллиф имонлиларнинг бутун эътиборини Масихга қаратади, Унинг бошдан кечирган азоблари ҳақида сўз юритар экан, имонлиларни Масихдан ибрат олишга, ёмонликка ёмонлик қайтармай, ҳаммани дуо қилишга чақиради.

1-БОБ

Дуойи салом

¹ Исо Масихнинг ҳаворийси мен — Бутрусдан Худонинг танланган ҳалқига салом! Эй Худонинг азиз ҳалқи, сизлар бу дунёда мусофир бўлиб яшаяпсизлар, Понтус, Галатия, Каппадокия, Асия ва Битиния вилоятларига* тарқалиб кетгансизлар, ² аммо Отамиз Худо азалда қарор қилиб, сизларни танлаган эди. Сизлар Исо Масихга итоат этишингиз ва Унинг тўкилган қони* орқали покланишингиз учун Худо қудратли Руҳи билан сизларни Ўзига ажратиб олди.

Худонинг чексиз инояти ва тинчлиги сизларга ёр бўлсин.

Масихдаги умидимиз

³ Раббимиз Исо Масихнинг Отаси Худога ҳамду санолар бўлсин! У бизга беҳад раҳм-шафқат кўрсатиб, янги ҳаёт берди. Исо Масих ўлиқдан тирилиб, барҳаёт бўлгани учун энди бизнинг умидимиз бор. ⁴ Шу боис Худо Ўз ҳалқига атаган қут-баракага биз кўз тикканмиз. Ҳа, самода сақланаётган бу абадий, сўлмас, беғубор барака сизларни кутмоқда. ⁵ Охирзамонда ошкора бўладиган нажотдан баҳраманд бўлишингиз учун Худо Ўз қудрати билан сизларни омон сақлайди. Имонингиз туфайли У сизларни қўриқлади. ⁶ Шунинг учун хурсанд бўлинглар! Сизлар турли синовлар туфайли вақтинча қийналяпсизлар, шундай бўлса ҳам қувонинглар. ⁷ Чунки синовлар имонингизнинг самимий эканлигини исботлаш учун керакдир. Ҳатто йўқ бўлиб кетадиган олтин ҳам оловда тобланиб, синалади. Сизнинг имонингиз эса олтиндан минг баробар қадрлироқдир. Исо Масих охиратда келганда синовдан ўтган имонингиз сизларга мақтов ва шон-шараф келтиради. ⁸ Сизлар Масихни кўрмаган бўлсангиз ҳам, Уни яхши қўрасизлар. Ҳозир ҳам Масихни кўрмай туриб, Унга ишоняпсизлар, қалбингиз сўз билан ифодалаб бўлмайдиган ажойиб бир қувончга тўла. ⁹ Ахир, имонингиз туфайли жонларингиз нажот топади.

¹⁰ Пайғамбарлар изланиб, бу нажотни чуқур ўргангандар. Сизларга

бериладиган Худонинг инояти ҳақида каромат қилганлар.¹¹ Уларнинг қалбларида Масиҳнинг Руҳи бор эди. Бу Руҳ уларга Масиҳнинг чекадиган азоб-уқубатлари ва азоблар кетидан келадиган улуғворлиги ҳақида олдиндан маълум қилган эди. Бу воқеалар қачон ва қай тарзда юз беришини пайғамбарлар билмоқчи бўлар эдилар.¹² Аслида уларнинг бу изланишлари ўз манфаати учун эмас, балки сизларнинг манфаатингиз учун қилинганини Худо уларга аён этди. Пайғамбарлар эълон қилган нажот ҳақидаги Хушхабар сизнинг даврингизда амалга ошиди. Бу Хушхабарни сизларга осмондан юборилган Муқаддас Руҳнинг қудратига тўлган одамлар баён этишди. Ҳатто фаришталар ҳам бу нажотнинг қай тарзда амалга ошишини интизорлик билан кутаётган эдилар.

Худога манзур ҳаёт кечиринглар

¹³ Хуллас, эс-хушиңгизни йигиб олинглар, ҳушёр бўлинглар. Бутун умидингизни Худонинг иноятига боғланглар. Ахир, Исо Масиҳ охиратда келганда Худо сизларга иноят кўрсатиб, нажот беради.¹⁴ Худога итоаткор фарзандлар бўлинглар, олдинги ғафлат пайтида сизларни қамраган эҳтиросларга қул бўлиб қолманглар.¹⁵ Аксинча, бутун юриш-туришингизда муқаддас бўлинглар, зеро, сизларни даъват этган Худо муқаддасдир.¹⁶ Ахир, Худонинг Ўзи: “Муқаддас бўлинглар, чунки Мен муқаддасман”*, деб айтган.

¹⁷ Сизлар Худога илтико қилиб, Уни Ота деб атайсизлар. Аммо эсингизда тутиングлар, Худо юз-хотирчилик қилмайди, У ҳар бир кишини қилган ишига яраша тақдирлайди ёки жазолайди. Шундай экан, бу дунёдаги мусофиричилик даврингизда Худодан қўрқиб яшанглар.¹⁸⁻¹⁹ Зотан, сизлар ота-боболарингиздан ўрганган бемаъни турмуш тарзингиздан кумуш ёки олtingа ўхшаш ўткинчи нарсалар эвазига эмас, балки Масиҳнинг қимматбаҳо қони эвазига қутулгансизлар. Ахир, Масиҳ Худонинг бенуқсон қурбонлик Кўзисидир.²⁰ Худо Масиҳни дунё яратилишидан олдин бу хизмат учун тайинлади. Энди шу охирги кунларда эса Уни сизлар учун зоҳир қилди.²¹ Сизлар Масиҳ орқали Худога ишонасизлар. Худо Масиҳни тирилтириб, улуғворликка эриштиргани учун ҳам сизлар имонингизда событ турибсиз, чин қалбдан Худога умид боғлагансиз.

²² Сизлар ҳақиқатга бўйсуниб*, гуноҳдан покланганингиз учун биродарларга самимий меҳр қўя оласизлар. Шундай экан, бир-бирингизни чин юрақдан, ихлос билан яхши кўринглар.²³ Ахир, сизлар янгидан туғилгансизлар. Бу янги ҳаётни сизга фоний бандалар эмас, балки абадий ва ҳаётбахш Худонинг каломи ато этган.²⁴ Муқаддас битикларда шундай ёзилган:

“Инсон зотининг ҳаммаси майсадай,
Уларнинг шуҳрати дала гули кабидир.
Ўтлар қурийди, гуллар сўлиб қолади.
²⁵ Эгамизнинг каломи эса абадий туради.”*

Ана шу калом сизларга эълон қилинган Хушхабардир.

2-БОБ

Худонинг каломига интилинглар

¹ Энди ҳар қандай ёмон ният, хийла-найранг, иккюзламачилик, рашк-ҳасад ва фийбатни ўзингиздан соқит қилинглар.² Янги туғилган чақалоқ соф она сутини тусагандай, сизлар ҳам Худо каломига ташна бўлинглар. Калом билан озиқланиб, улғайиб, нажотга эришинглар.³ Ахир, сизлар Раббимиз Исонинг

муруватидан баҳраманд бўлдингизлар.

Худонинг маъбади учун тирик тошлар

⁴ Инсонлар рад этган, лекин Худо қимматбаҳо деб танлаган тирик тошга — Раббимиз Исога яқинлашинглар. ⁵ Шунда ўзларингиз ҳам тирик тошлардай бўласизлар. Худо сизлардан руҳий маъбад барпо этади. Сизлар муқаддас руҳонийлар бўлиб хизмат қиласизлар ва Исо Масиҳ орқали Худога мақбул руҳий курбонликлар келтирасизлар. ⁶ Зеро, Муқаддас битикларда Худо шундай деган:

“Мана, Мен жойлаштиряпман Қуддусда*
Танланган, қимматбаҳо тамал тошини*.
Унга таянган ҳеч бир инсон уятга қолмайди.”*

⁷ Сизлар — Масиҳга ишонганлар учун бу тош қимматбаҳодир. Аммо ишонмаганларга Муқаддас битиклардаги шу сўзлар* тўғри келади:

“Бинокорлар рад этган тош
Бинонинг тамал тоши бўлди.
Баъзилар бу тошга қоқинади,
Унинг дастидан йиқилади.”

⁸ Имонсизлар Хушхабарни рад этиб, итоатсизлик қилганлари учун қоқинадилар. Улар ана шу қисматга маҳкум бўлганлар.

⁹ Аммо сизлар — танланган бир насл, руҳонийлар шоҳлиги, муқаддас қавм*, Худонинг азиз халқисиз. Худо сизларни зулматдан Ўзининг ажойиб нурига даъват этган, Унинг буюк ишларини эълон қилишингиз учун сизларни танлаган. ¹⁰ Сизлар бир вақтлар Худога бегона эдингизлар, энди эса Унинг халқисизлар. Бир вақтлар Худонинг марҳаматидан бебаҳра эдингизлар, энди эса Ундан марҳамат топдингизлар*.

Жамиятда Худога муносиб ҳаёт кечиринглар

¹¹ Эй азизларим, сизлардан ўтиниб сўрайман, жонга қарши курашадиган нафс эҳтиросларидан сақланинглар. Ахир, сизлар бу дунёда ғарибу мусофирсизлар.

¹² Имонсизлар орасида Худога муносиб ҳаёт кечиринглар. Улар сизларни ёмонлиқда айбласалар-да, эзгу ишларингизни қўриб, ким билсин, балки тавба қилишар ва қиёмат куни Худони улуғлашар.

¹³ Инсонлар томонидан ўрнатилган ҳар қандай ҳокимииятга, Эгамиз ҳақи-хурмати, бўйсунинглар. Олий ҳоким бўлган шоҳга* ҳам, ¹⁴ у тайинлаган ҳокимларга ҳам итоат қилинглар. Зеро, ҳокимлар ёмонлик қилганларни жазолаш учун, яхшилик қилганларни эса тақдирлаш учун тайинланган. ¹⁵ Сиз ҳақиқатни билмаган нодон одамларнинг оғизларини қилган яхшилигингиз билан ёпинглар, чунки бу Худонинг хоҳишидир. ¹⁶ Озод одамлардек яшанглар, аммо озодлик ниқоби остида ёмонлик қилманглар. Худонинг қулларида ҳаёт кечиринглар.

¹⁷ Ҳамма одамларни хурмат қилинглар. Имонли биродарларингизни яхши кўринглар. Худодан қўрқинглар, давлат раҳбарига иззат-эҳтиром кўрсатинглар.

¹⁸ Эй қуллар, Худодан қўрққанингиз учун* хўжайнларга итоат қилинглар. Нафақат меҳрибон ва мулойимларга, балки қаттиққўл хўжайнларга ҳам бўйсунинглар. ¹⁹ Агар сизлар Худони мамнун қилмоқчи бўлиб, тўғри иш қилсангиз-у, ноҳақ азобларга чидасангиз, Худони рози қилган бўласиз.

²⁰ Борди-ю, қилган гуноҳингиз учун таёқ еб чидасангиз, бу сизга шараф келтирармиди?! Аммо яхшилик қилиб туриб, ноҳақ азобларга чидасангиз,

Худонинг мақтовига сазовор бўласиз.

Масиҳдан ибрат олинглар

²¹ Ҳатто азоб чекканингизда ҳам Худо сизларни яхшилик қилишга даъват этган. Масиҳ сизлар учун азоб чекиб, намуна бўлди. Унга тақлид қилинглар. ²² Ахир, У ҳеч қандай гуноҳ қилмаган, оғзидан бирон ёлғон сўз чиқмаган*. ²³ У ҳақорат қилинганда ҳеч кимга ҳақорат билан жавоб қайтармади, азоб чекканда ҳеч кимга таҳдид қилмади. Фақат одилона ҳукм қиладиган Худога Ўзини топширди. ²⁴ У гуноҳларимизни Ўзига олди, аъзои бадани ёғочда* азоб чекди. Шу туфайли биз гуноҳ учун ўлганмиз ва солиҳ ҳаёт кечира оламиз. Унинг яраларидан биз шифо топдик. ²⁵ Илгари сизлар адашиб юрган чўпонсиз қўйларга ўхшар эдингизлар, энди эса жонларингизнинг посбони бўлган Чўпонга* қайтиб келдингизлар.

3-БОБ

Эр-хотинлик муносабатлари

¹⁻² Эгамиз ҳақи-ҳурмати, сиз, хотинлар, ўз эрларингизга бўйсунинглар. Эрларингиз Хушхабарни рад этишса ҳам, уларга итоат этинглар. Сизнинг ибратли хулқ-авторингиз ҳар қандай сўздан кўра, таъсирироқ бўлади. Эрларингиз покиза ҳаётингизни ва Худодан қўрқиб яшаётганингизни кўриб, имонга келишади. ³ Сизнинг жозибангиз ўрилган соchlар, олтин тақинчоқлар, чиройли кийимлар каби ташқи зеб-зийнатдан иборат бўлмасин. ⁴ Аммо қалбингиздаги ювови ва сокин рух сизларнинг сўлмайдиган ички гўзаллигингиз бўлсин. Худонинг назарида бундай гўзалликнинг қадри юксакдир. ⁵ Ўтмишда Худога умид боғлаган муқаддас хотинлар ҳам ўзлари шу йўсинда безаниб, эрларига бўйсунар эдилар. ⁶ Масалан, Сора* ҳам Иброҳимга итоат этиб, уни хўжайин деб атар эди. Агар сизлар яхшилик қилиб, ҳар қандай қўрқувдан саросимага тушмасангиз, Соранинг қизлари ҳисобланасизлар.

⁷ Эй эрлар, сизлар ҳам, Эгамиз ҳақи-ҳурмати, хотинларингизга эътиборли бўлинглар, улар заиф жинсдан эканлигини ҳисобга олинглар. Улар ҳам абадий ҳаёт иноятидан баҳраманд бўлганлари учун уларни ҳурмат қилинглар. Акс ҳолда, ибодатларингиз ижобат бўлмайди.

Ҳақиқат йўлида азоб чекиши ҳақида

⁸ Хуллас, ўзаро ҳамфикр, ҳамдард бўлинглар, бир-бирингизни биродарларча яхши кўринглар, меҳр-шафқатли ва камтар бўлинглар. ⁹ Ёмонликка ёмонлик, ҳақоратга ҳақорат билан жавоб қайтарманглар, аксинча, ҳаммани дуо қилинглар. Зеро, Худо сизларни шунга даъват этган. Буларга риоя қилсангиз, барака топасизлар. ¹⁰ Ахир, Муқаддас битикларда шундай ёзилган:

“Кимки ҳаётдан завқланиши,
Бахтли умр кўришни истаса,
У тилини ёмон сўздан тийсин,
Оғзини ёлғон гапдан асрасин.

¹¹ Ёмонликдан қайтиб, яхшилик қилсин.
Тинчлик истаб, тинчлик пайида бўлсин.

¹² Чунки Эгамиз солиҳларни кузатиб туради,
Уларнинг илтижосини Эгамиз эшитади.
Бадкирдорлардан эса юз ўгиради*.”*

¹³ Агар яхшилик қилишга бел боғласангиз, ким ҳам сизларга озор бера оларди?! ¹⁴ Ҳатто түғри иш учун азоб чекаётган бўлсангиз ҳам, баҳтиёrsизлар! Дўқ-пўписа қилувчилардан қўрқманглар, ҳаяжонга тушманглар. ¹⁵ Қўрқувга тобе бўлманглар, балки бутун қалбингиз билан Раббимиз Исо Масиҳнинг* ҳокимиятига бўйсунинглар. Масиҳга бўлган умидингиз ҳақида сиздан сўраган ҳар бир кишига жавоб беришга доимо тайёр туринглар. Лекин буни мулоҳимлик ва ҳурмат билан бажо қилинглар. ¹⁶ Виждонингиз тоза бўлсин, токи Масиҳ йўлидаги ибратли ҳаётингизни ёмонлаганлар ўз гапларидан уялиб қолсинлар.

¹⁷ Агар яхшилик қилиб азоб чекишингизни Худо лозим кўрса, ҳар ҳолда ёмонлик қилиб азоб чекишдан бу афзалроқdir.

Масиҳ ёвузлик устидан ғалаба қозонди

¹⁸ Масиҳ бизни гуноҳларимиздан то абад фориғ қилиш учун азоб чекканини ёдингизда тутинглар. У солиҳ бўла туриб, биз, гуноҳкорларни Худога яқинлаштириш учун жонини фидо қилди. Уни жисман ўлдиришди, аммо У янги, улуғвор ҳаёт учун тирилди*. ¹⁹ Сўнг зинданга қамалган ёвуз руҳлар* олдига бориб, улар устидан ғалаба қилганини эълон этди. ²⁰ Қадим замонда бу руҳлар Худога итоатсизлик қилиб, инсониятни йўлдан оздирганди. Аммо Худо сабр қилди. Нух* ўз кемасини қуриб бўлгунча Худо инсониятни ҳукм қилмай, кутиб турди. Ўша кемага фақат саккизтагина одам кириб, тўфон сувларидан омон қолганди. ²¹ Нух ва унинг оиласи билан рўй берган бу ҳодиса биз учун тимсол ҳисобланади. Бу тимсол бизнинг имонга келишимизни ва сувга чўмдирилишимизни билдиради. Чўмдирилиш маросими баданни кирдан тозалаш эмас, балки Худога: “Сенга содиқ қоламан”, деб чин юрақдан ваъда бериш демакдир. Дарҳақиқат, сизлар сувга чўмдирилганингизда, Исо Масиҳнинг тирилиши туфайли нажот топдингизлар. ²² Масиҳ осмонга қўтарилиб, Худонинг ўнг томонида ўтирибди*. Коинотдаги ҳар бир фаришта, ҳар қандай кучлару ҳукмронлар Масиҳга тобедир.

4-БОБ

Худо йўлида яшаш

¹ Масиҳ бу дунёда азоб чеккани каби, сизлар ҳам азоб чекишига тайёр туринглар. Зотан, азоб чекишига рози бўлган киши гуноҳдан юз ўгирган бўлади. ² Бундай одам қолган умрини нафсини қондиришга эмас, Худонинг иродасини бажаришга бағишлайди. ³ Сизлар ўтмишда худосизлардай яшаганингиз етар. Ўша вақтларда ахлоқсизлик, шаҳватпарастлик, майхўрлик, айш-ишрат, кайф-сафо, разил бутпарастлик билан кун кечирадингизлар. ⁴ Энди эса атрофдагилар сизларни қўриб, ҳайрон бўляптилар. Уларнинг ярамас қилмишларига қўшилмаганингиз учун сизларни ҳақорат қиляптилар. ⁵ Аммо улар ўз қилмишлари учун Худо олдида жавоб берадилар. Худо тиригу ўликларни ҳукм этишига тайёр турибди. ⁶ Хушхабар нима сабабдан эълон қилинганини эсингизда тутинглар. Тўғри, Хушхабарни эшитган кўп одамлар оламдан кўз юмди, чунки ўлим бу дунёга гуноҳ натижасида кириб келди. Улар ҳам, бошқа инсонлар каби, жисман ўлимга мубтало бўлишди. Бироқ бир кун келиб, Худо уларга улуғвор, янги ҳаёт ато қиласи*.

⁷ Охирзмон яқинлашиб қолди. Ақлингизни йифиб, доим ҳушёрлик билан ибодат қилинглар. ⁸ Авваламбор, бир-бирингизни чин юрақдан яхши қўринглар. Чунки севги кўп гуноҳларни ювади. ⁹ Нолимай, очиқ чехра билан бир-бирингизни меҳмон қилинглар. ¹⁰ Худо сизларга берган инъомлар билан бир-бирингизга

хизмат қилинглар. Худонинг бу бой эҳсонларидан оқилона фойдаланинглар.

¹¹ Ваъзхонмисиз? Шундай ваъз қилингки, гўё сиз орқали Худонинг Ўзи гапиргандай бўлсин. Хизматчимисиз? Худонинг берган кучига мувофиқ хизмат қилинг. Токи Исо Масиҳ орқали Худо ҳар бир ишингизда ва ҳар бир сўзингизда улуғлансин. Қудратли Худога абадулабад шон-шарафлар бўлсин. Омин.

Масиҳ учун азоб чекиши

¹² Эй азизларим, худди ғайритабии ҳодиса юз бергандай, бошингизга тушган оғир синовлардан ҳайрон бўлманглар. ¹³ Аксинча, Масиҳнинг азобларига шерик бўлганингиздан хурсанд бўлинглар! Шундай қилсангиз, У охиратда улуғворликка бурканиб келганда, қалбингиз янада кўпроқ қувончга тўлади. ¹⁴ Агар сизларни Масиҳга тегишли бўлганингиз учун ҳақорат қилишса, баҳтлисизлар! Ахир, Худонинг Руҳи сизларга мадад беради. У сизларни Худонинг улуғворлигидан баҳраманд қиласиди*. ¹⁵ Орангизда ҳеч ким қотил, ўғри, бадкирдор ёки жанжалкаш одам сифатида азоб чекмасин. ¹⁶ Аммо масиҳий бўлганингиз учун азоб чексангиз, бундан уялманг, аксинча, сизларни бундай номга сазовор қилган Худони улуғланг.

¹⁷ Худо дунёни ҳукм қиладиган вақт келди. У ҳукмини Ўз хонадонидан бошлайди. Агар биз биринчи навбатда ҳукм қилинадиган бўлсак, унда Хушхабарни рад этиб, Худога итоат қилмаганларнинг охирати нима бўлади?

¹⁸ Агар солиҳ одам зўрға қутулса, бетавфиқу гуноҳкорнинг ҳоли не кечади?*

¹⁹ Шундай экан, Худонинг иродасига кўра, азоб чекаётган бўлсангиз, яхшилик қилишда давом этинглар, ўзингизни содиқ Яратувчига топширинглар.

5-БОБ

Оқсоқолларга ва ёшларга насиҳат

¹ Эй жамоат оқсоқоллари, энди сизларга бир насиҳатим бор. Мен ҳам сизларга ўхшаган оқсоқолман. Масиҳ чеккан азоблари ҳақида шаҳодат берувчи ва Унинг зоҳир бўладиган улуғворлигининг иштирокчиси сифатида мен сизлардан ўтинаман: ² Назоратингиздаги Худонинг сурувини яхши боқинглар. Бу хизматни мажбурият юзасидан эмас, балки чин кўнгилдан, Худога манзур тарзда бажаринглар. Шунчаки пулпастлик мақсадида эмас, самимият билан ижро этинглар. ³ Қўлингиз остидаги сурувга ўз ҳукмингизни ўтказмай, уларга ўрнақ бўлинглар. ⁴ Ана шунда, Бош Чўпонимиз — Масиҳ зоҳир бўлганда, сизларга сўлмас, улуғворлик тожи берилади.

⁵ Эй ёшлар, оқсоқолларга итоат этинглар. Ҳаммангиз — ёшмисиз, қаримисиз, ўзингизни камтар тутиб, бир-бирингизга хизмат қилинглар. Зоро, “Худо мағуруларга қарши чиқади, камтарларга эса иноят кўрсатади.”* ⁶ Шундай экан, Худонинг қудратли қўли остида ўзингизни паст тутинглар. У Ўз вақтида сизларни юксалтиради. ⁷ Барча ташвишингизни Худога топширинглар, чунки У ҳамиша сизларга ғамхўрлик қиласиди.

⁸ Ҳушёр ва бедор бўлинглар! Душманингиз бўлган иблис шердай бўкириб, бирорни ютиб юбориш учун изғиб юрибди. ⁹ Иблисга мустаҳкам имон билан қарши туринглар. Шуни билингларки, бутун дунёдаги имонли биродарларингиз сизлар каби, азобларга дучор бўлмоқдалар. ¹⁰ Гарчи сизлар бу қисқа ҳётда азоб чекиб яшасангизлар ҳам, Худонинг Ўзи сизларга мадад бериб, барчангизни баркамол, саботли, куч-қудратли ва мустаҳкам қиласиди. Ахир, иноятга бой Худо Исо Масиҳ орқали сизларни Ўзининг абадий улуғворлигига шерик қилиш учун даъват этган. ¹¹ Қудратли Худога абадулабад ҳамдлар бўлсин. Омин.

Сўнгги саломлар

¹² Мен бу қисқа мактубимни Силаснинг* ёрдами билан ёзdim. Уни ишончли биродар деб биламан. Мактубимда сизларга насиҳат қилиб, Худонинг ҳақиқий инояти ҳақида ёзdim. Имонда собит қолишингиз учун Унинг бу иноятига таянинглар.

¹³ Сизлар каби Бобилдаги* танланган имонлилар жамоати ва менга ўғилдай бўлиб қолган Марк* сизларга салом йўлламоқдалар.

¹⁴ Бир-бирингизга меҳр-муҳаббат кўрсатиб, ўпишиб кўришинглар. Масиҳга тегишли бўлган ҳаммаларингиз тинч-омон бўлинглар*.

ИЗОХЛАР

Рим империясига қарашли түртта вилоят — 1:1 га ва ўша оятнинг изоҳига қаранг.

1:1 Понтус...Битиния вилоятлари — Рим империясига қарашли бўлган тўртта вилоят, Понтус ва Битиния бир вилоятни ташкил қилган. Бу вилоятлар ҳозирги Туркия худудида эди. Ҳосил байрамида Қуддусга ўша вилоятлардан бир нечта одамлар келган (Ҳаворийлар 2:5-11 га қаранг). Павлус мана шу вилоятларнинг баъзиларида Хушхабарни эълон қилган (Ҳаворийлар 16:6, 18:23, 19:10, 26 га қаранг).

1:2 Унинг тўкилган қони — юононча матнда *Унинг сепилган қони*. Ибронийлар 9:11-21, 10:19-22 га қаранг.

1:16 Левилар 11:44-45, 19:2 га қаранг.

1:22 Сизлар ҳақиқатга бўйсуниб... — юононча матндан. Баъзи юонон қўлёзмаларида *Муқаддас Рӯҳ орқали сизлар ҳақиқатга бўйсуниб*.

1:24-25 Муаллиф бу ўринда Ишаё 40:6-8 нинг қадимиј юононча таржимасидан фойдаланган.

2:6 Қуддус — юононча матнда *Сион*. Қуддусдаги Маъбад қурилган тепалик Сион тоғи деб аталган. Эски Аҳддаги шеърий парчаларда ва пайғамбарлар битикларида Сион сўзи кўпинча Қуддус шаҳрига ёки Худонинг халқига нисбатан ишлатилган. Тўлиқроқ маълумотга эга бўлиш учун луғатдаги СИОН сўзига қаранг.

2:6 тамал тоши — қадимги пайтларда қурилишда пойдевор учун қўйилган биринчи ва энг муҳим тош ҳисобланарди. Бу тош пойдеворнинг бир бурчагини ҳосил қилиб, бинонинг қолган қисми ўша тошнинг жойлашуви бўйича қуриларди.

2:6 Муаллиф бу ўринда Ишаё 28:16 нинг қадимиј юононча таржимасидан фойдаланган.

2:7 Муқаддас битиклардаги шу сўзлар — бу ўринда Бутрус Забур 117:22, Ишаё 8:14 ни назарда тутган.

2:9 руҳонийлар шоҳлиги, муқаддас қавм — Чиқиш 19:6 га қаранг. Яна Ишаё 61:6, Ваҳий 1:6, 5:9-10, 20:5-6 га қаранг.

2:10 Сизлар...Ундан марҳамат топдингизлар — бу ўринда Бутрус Хўшеба 1:6, 9-10, 2:23 ни назарда тутган.

2:13 Олий ҳоким бўлган шоҳ — ўша пайтдаги Рим императори.

2:18 ...Худодан қўрққанингиз учун... — ёки ...камоли эҳтиром билан....

2:22 ...У ҳеч қандай гуноҳ қилмаган, оғзидан бирон ёлғон сўз чиқмаган... — шу бобнинг 22-25-оятларида Бутрус Ишаё 53:5-7, 9, 12 ни назарда тутган.

2:24 ёғоч — Бутрус хочга ишора қилиб, Қонунлар 21:23 даги ёғочга қоқилган одам *Худо томонидан лаънатланган*дир деган гапни тингловчиларига эслатмоқчи бўлган.

2:25 Ҷўпон — яъни Исо Масиҳ (Юҳанно 10:11-16, Ибронийлар 13:20 га қаранг).

3:6 Сора — Ибтидо 18:12 га қаранг.

3:12 Юонча матндан. Баъзи юон қўлёзмаларида қуйидаги сўзлар охирги мисра сифатида қўшимча қилинган: *Уларнинг хотирасини ер юзидан ўчиради.*

3:10-12 Забур 33:13-17 га қаранг.

3:15 *Исо Масиҳ* — юонча матндан. Баъзи юон қўлёзмаларида *Худо.*

3:18 ...*У янги, улуғвор ҳаёт учун тирилди* — юонча матнда ...*У руҳда тирилган.* Бу ўринда руҳда сўзи инсоннинг тирилган танадаги янги ҳолатига ишора қиласди.

3:19 *Зиндонга қамалган ёвуз руҳлар* — қилмишлари учун жазоланган илоҳий зотларга ишора бўлиши мумкин, бу зотлар ҳақида Ибтидо 6:1-4 да ёзилган (шу бобнинг 20-оятига қаранг). Яна 2 Бутрус 2:4, Яхудо 6-7-оятларга қаранг.

3:20 *Нуҳ* — Ибтидо 6:5-7:23 га қаранг.

3:22 ...*Худонинг ўнг томонида ўтирибди* — Забур 109:1 га қаранг. Ўнг томон мурувват ва барака ўрни деб ҳисобланган.

4:6 ...*Худо уларга улуғвор, янги ҳаёт ато қиласди* — юонча матндан сўзма-сўз таржимаси ...*улар руҳда Худога муносаб равишда ҳаёт кечирадилар.* Бу ўринда руҳда сўзи Худо билан муносабат қилиб кечириладиган янги ҳаёт тарзига ишора қиласди.

4:14 Юонча матндан. Баъзи юон қўлёзмаларида қуйидаги сўзлар оятга қўшимча қилинган: *Уларга қолса, Руҳни ҳақорат қиласдилар, сизларда эса Руҳ шарафланади.*

4:18 *Агар солиҳ одам зўрга қутулса, бетавфиқу гуноҳкорнинг ҳоли не кечади?* — муаллиф бу ўринда Ҳикматлар 11:31 нинг қадими юонча таржимасидан фойдаланган.

5:5 Муаллиф бу ўринда Ҳикматлар 3:34 нинг қадими юонча таржимасидан фойдаланган.

5:12 *Силас* — юонча матнда бу исмнинг бошқа варианти *Силванус.* Силас илк жамоатнинг етакчиси бўлиб, ҳаворий Павлуснинг Хушхабар ёйиш мақсадида қиласган иккинчи сафарида унга ҳамроҳ эди (Ҳаворийлар 15:22, 32, 36-41 га қаранг).

5:13 *Бобил* — Эски Аҳд даврида Бобил шаҳри қудратли империянинг пойтахти эди. Худонинг халқи у ерга сургун қилинган. Ушбу китоб ёзилган пайтда имонлилар Бобил номини баъзан Римга нисбатан ишлатар эдилар. Рим ўша даврда ҳукмрон бўлган империянинг пойтахти эди. Бутрус бу номни рамзий маънода ишлатаётган бўлиши мумкин. Анъанага кўра, Бутрус умрининг сўнгги йилларини Римда ўтказган ва ўша ерда имони учун қатл қилинган.

5:13 *Марк* — Марк баён этган муқаддас Хушхабарнинг муаллифи. Марк ҳаворий Бутруснинг ҳамкори бўлган ва унинг таълимоти ва ваъзларига асосланган ҳолда Хушхабарни баён қиласган. У Қуддус шаҳридан эди (Ҳаворийлар 12:12, 25, 13:5, 15:37-39, 2 Тимўтий 4:11 га қаранг).

5:14 Юонча матндан. Баъзи юон қўлёзмаларида қуйидаги сўз оятга қўшимча қилинган: *омин.*